


**SEA-JOTANI NAMA-NAMGIJAKO
SE-PARAKANI A·BACHENGIPA
BEWALRANG.**

(Elements Of Literary Criticism.)



Milton S. Sangma.

**Skanggipa Chapa Ka'atgipa 1984.
King 1000.**

*Chapa ka'atgipa,
Segipa an'tangan.*

Dam : Rs. 5.00

Chapa ka'gipa,

**Meghalaya State Co-operative Union Printing Press,
Shillong - 1.**

KATTA BICHONGRANG

KATTA BICHONG	JAK
Janapchengani	
Chap I : Sea-Jotani Gimin		1-3
Chap II : Aganbewal gita Seanirang (Prose) ...			4-7
Chap III : Poedorang	8-13

JANAPCHENGANI

Anga ia chongipa kitapko "Sea-jotarangni nama namgijako se-parakani a'bachenggipa bewalrang" ine biming done seaha. Indakgipa subjectni gimin sena an'tango chu ongnikgijanirangko nikoba sedrana nanga gita ong'aha maina indake sedrajaode Porainasigipa chatro-chatrirang kitap gri ong'skagenchim. Ia bilsio North-Eastern Hill Universityni Academic Council, pilak Modern Indian Languagerangko apsan syllabus dakchina ge'etaha. Ua gitan Modern Indian Languagerangko skienggipa adita Professorang tom'e apsan gadangni syllabusrangko dakaha. Ua syllabusrangko dakanio "Elements of Literary Criticism" P. U. C. onian dongna nanga ine tik k'aha Indakgipa subjectni gimin A'chikkuo segimin kitap dongjani gimin anga iako sena gita an'tangko draaha.

Ia seanirangko anga Khasi aro gipin ku'sikrang baksa apsan topicrangko seoke seaha. Banggija somoerangko ra'e sena nanga ga'akaha maina iako 1985 bilsionin ra'na nanga-hachim. Jeba ong'bo, anga iako ka'mao janapgipa kitapprango ga'chate kan'dike seskaaha.

- (1) Joseph T. Shipley, ed. : Dictionary of Literature.
- (2) Roger Fowler, ed. : A Dictionary of modern Critical Terms.
- (3) R. J. Rees : English Literature - An Introduction to Foreign Readers.
- (4) W. J. Hudson : An Introduction to the Study of Literature.
- (5) K R. Srinivasa Iyenger, : Introduction to the Study of and Prem Nanda Kumar : English Literature.
- (6) A. Prasad. : An Introduction to English Criticism.

Uni gimin ia subjectni bidingo saoba apalbate ui'na skode ua kitaprangko aro gipinrangkoba poraena nanggen. Ian kan'-dikgipa seanisan ong'aia. Ja'mano ia subjectko skigiparangoni saoba nambate aro ga'subate seanganiko dakgen ine anga ka'donga.

*Dated Shillong,
the 4th October, 1984*

Milton S. Sangma

CHAP . I.

SEA-JOTANI GIMIN.

SEA-JOTA BA LITERATURE MAIKO MINGA ?

Segimin-jotgimin ba Literature maiko minga uko aganna neng'a indiba ua maia uko ui'na neng'ja. Uandaken Achak ba menggo maiko minga uko aganna ba sena neng'naba donga indiba uarangara maia uko ma'sina altuabea. Sea-jotani be-walrang Achak ba menggorangni rokom ba bimangrangni bang'a gita donga indiba "Mama Tomni Jamdap" ba "Macbeth" rangara chong'motgipa segimin-jotgimin ba Literature ong'a ine aganna an'ching jajajawa. Matburingrangko jilani gimin seaniba segimin-jotgimin ong'a, Howard Denison Mominni segimin "Do'kua" Poedoba uan ong'a indiba "A'chik Songbad" "Chadambe" ba gipin gipin Songbadrang ba Enevelopadaea Britannica apsan gadangni segimin jotgiminrang ong'na man'ja Uarang apalbatgipa ariosa ba aganramramaniosa Segimin-Jotgimin ba Literature ine channako man'paia. Mitam manderang ia ramram segimin-jotgimin ba chapa ka'giminrangko Literature channatna sikjae, "Banaegipa Seani" ba "Ning'tugipa Seani" ba "Chanchibewale Seani" ine jakkalska.

Minggipin neng'nikaniara, maiko namgipa ba namgijagipa Seani ine ma'eke agangen. Mitam manderang namgijagipa Seaniko ba Poedoko porae uade literature ba Sea-jotan ong'srangja ine agana indiba uarangde aganbingbanganisa ong'skaia. Ia Poedokode angade namnikja ba iade namgijagipa Poedo ong'a ine aganosa krabatgen. A'gilsako sea-jotarangoni bang-batan namgipa seanirang ong'ja. Mitamrangara beben hama, mitamrangara namja aro bang'gijasamangmang namchongmotgipa seanirang ong'a, indiba iarang pilakan Sea-jotanirang ba Literature ong'a.

NAMGIPA SEANIO BA LITERATUREO MAI GUNRANG DONGNA NANGA ?

Bang'a manderangni chanchiani gita namgipa literature ba Seani "mandeni janggi tangani bewalko nambatatna dakchakgipa" ba Matthew Arnoldni Poedoni gimin aganani gita "Mandeni janggi tangani bewalni nama namgijako parakgipa" on'na nang'a. Uni gimin, Poedo segipa ong'bo, Dakmesokaniko segipa ong'bo ba Songsarni gimin golpo banae segipaba ong'bo, uamang an'chingna maiba gisiko tikal nangchaksoani ba maiba ideako on'na man'na nauga jean mandeni janggi tangani gadangko nambatatna dakchakani ong'gen.

Namgipa Seanio minggipin gunko nikna ka'dongsoaniara, an'tangni seani bewal ba styletang gita seani, Chanchiatang ba golpo banasatang gita seanian ong'a. Uni gimin namgipa seanirang gimikan jatni dakbewalrang, cha'bewalrango pangchake banaedrae segiparang ong'a.

Sena budhi dongmangmangaianichi ba gisik nangmangmangaianichi namgipa Seaniko dakna man'gen ia ong'ja Namgipa Seaniko dakna, ranta ka'anichi aro seani bewalrangko skie ra'anichiba man'na ama. Doctorrang, Engineerrang ba Ukilrang gita beben Poedo da golpo banae segiparang trainingko ra'na nangja indiba sena changani gunko jotton ka'stapjaode namgipa seaniko ong'atna man'ja. Aganku'akmao segiparang ku'siktangchi Grammarko talna nanggen, ku'siktangni kattarangko pilakkon ong'nasiple ui'na nanggen, mingsingbatgipa kitap segiminrangko poraiman'nananggen aro ua nama styleo sena changna nanggen.

Poraina gong'mangmangaianichi ba serongmangmangaianichi namgipa kitap segipa ong'na man'ja. Ua kitap seani bewalko ui'gipa, sena sappipa ong'na nanggen aro ua obostani kri krabatgipa kattarangko jakkalna changgipa ong'na nanggen.

Pilak literature ba segipa kitaprango ong'nasiple nkgipa mongsonggipa namgipa gunara "Nama ba namgijaniko ma'siani ong'a". Segipa sakprakprakan, nama ba namgijaniara chong'motgipa ong'a ine uamangni segipa kitapko poraigipa sakprakna ui'atanian ong'a. Uni gimin bon'kame indake aganna man'gen je Literature ba Seani-jotaniara Janggi tangani ba a'gilsakni gimin mitam chanchianirangko ba mandeni dake ka'e nie ui'anirangko ruuta bilsirangna kattatangchi see donangan ni ong'a.

Sea-jotani ba literature namgipa ba namgijagipa ong'naba donga indiba namgipa seaniara ka'mao mitam janapgipa gunrang dongna nanggen. Uarang :—

- (i) Bebeko parakani, (ii) Changatang gita banae styletango seani, (iii) Sena changani, aro (iv) Nama ba namgijaniko mesoke seani.

SEA-JOTANI NAMA NAMGIJAKO SE-PARAKANI INE MAIKO MINGA ?

Sea-jotani nama ba namgijako se parake mesokani inani ortoara, badiaba kitap ba lekka seaniko badijana kingking nama ba namja uarangko sandirikkite mesokani ong'a. Iandagkipani kama'a, "mairango namja ba ong'ja" uko niani ong'a ba E. B. Browningni aganani gita "Nitoaniko dingtangmancha ma'eke mesokani" ong'a. Victor Hugo agana, "Ua seaniara namama namja, uan sandie nigiparangni kam ong'a". Indiba ia sandigiparang maio ga'chate ia seani nama ine se parakgen aro ia seaniara namja ine jegalgen ?

Bang'a lekka segiparangni aganani gita "indakgiparangko bichal ka'nade uani gamchatanirangko sandianin ong'a". Uni gimin indakgiparangko bichal ka'gipade ka'mao minggittam sing'anirangko aganchakna nanggen :—

- (i) Ua kitapko segipara maiko parakna jettan ka'aha ?
- (ii) Ua uko parakanio baditana kingking chu'sokgipa ong'aha ?
- (iii) Uara gipinrangna parakna kragipa ong'ama ?

Carlyleni aganani gita, "ia miksonge parakaniera ba uni kamara baditana kingking an'chingni namnika gita ong'jaha indiba mandeni bewal gita ba a'gilsakni ong'bewal gita ba nambegipa poedoko seani niamrang gita ong'aha ; text kitaprango seani gita ong'ja indiba manderangni ka'tongrango aro chanchibewal-rango gita ong'aha", ukosa sandina nanga.

Uni gimin segimin-jotgiminrangni nama namgijaniko parake mesokani namgniara ka'mao gita adita manderangna ong'gen :—

(1) Sandie nigiparang, seani nama namgijaniko parakanio ba an'tangni chanchiani aro gisikni namnikgijaniko janapanio an'tangko control ka'a gnanng dakna ;

(2) Kitap segiparangko nambatnatna dakchakna ba uamangko dilna ;

(3) Gitcam serongbewalo pangchakdugae seanirangko gelna ba serongbewaloni dingtangsrange seani bewalko ra'gate seaniko champengna ;

(4) Seanio rokom rokom niamrangko ba ja'rikna nangani-rangko ja'rike sena mangrakatna ;

(5) Indakgipa sandie nie seanirangko poraigiparang, porae kusi ong'aniko man'na ba uamangna skie on'na, aro

(6) Seani gadangko nambatroroatna aro seani jotani biding gita mandeni gun ba changa sapaniko parakna a'sal gnannggipa a'bako o'pate on'na.



CHAP - II.

AGANBEWAL GITA SEANIRANG (PROSE)

Sea jotani rokom rokom bewalrang ba bimangrang gnang. Uarangi rokomsa Aganbewalo ba Aganku'akmao gita seani ong'a. Aganbewalo ba Aganku'akmao gita seaniba rokom rokom bimangrang gnang. Uarang :—

- (1) Dakmesokna Seani ba Drama,
- (2) Banaechrake jeni giminba segipa golpo ba Fiction,
- (3) Songsaro ong'enga obostarango pangchake banac segipa Golpo ba Novel,
- (4) Rochona Seani ba Essay.

(1) DAKMESOKNA SEANI BA DRAMA.

“Drama” kattani ortoara, ramram agangenchimode uan, “Dakmesokna ba Daksningna segimin” ong'a jeo dolsa mande-rang adita gipin manderangni cholon bewalrangko tamasa dakramo daksninge nigiparangna mesoka Tamasa dakramo mesokaniara, toromni bidingo ong'naba donga ba manderangko kusi ong'atna ong'naba donga ba duk ong'atna dakmesokani ong'naba donga indiba iarangan Dramani miksongani ong'a. Gni-gipa Dramani miksonganiara, mande jinma nigiparangna ong'a Poedo ba Golporangara poraigipa sakprakprakan gisik nangatani ong'a indiba Dakmesokani kitapko segipara semitingo mande jinmako gisiktangni mikgrono done sena nanga. Uni gimin Tamasa dakramo daksninge mesokanian Dramani ba Dakmesokani kitapni chong motgipa miksongani ong'a.

Dakmesokna Seani ba Dramani rokomrang mongsongbate rokomgni gnang. Uarang (1) Ka'dingatna ba Gisik an'saoatna segipa Drama ba Comedy, aro (2) Duk ba Kalimaniko dakmesokna seani Drama ba Tragedy.

KA'DINGATNA BA GISIK AN'SAOATNA SEGIPA DAKMESOKANI BA COMEDY.

Aristotle agana, Ka'dingatna segipa Dakmesokani kitap mitam manderangni namgija, bewal ba nito-silgijani gimin segipa ong'a jean mandena gisik saaniko ba onainiko ra'baja'. Indak-gipa seaniara mande chong motni namgijana bate dake mesokani ong'a. Uarang mande saksani cholon bewalrangni gimin ong'-

gija nikgrangrao nikgipa cholon-bewalrangko ra'gope seani ong'a. Uni giminsa nikgrangraode ua tamasa dakgiparangko badiaba mande chong'motni cholon-bewalko daksninga ine chanchia indiba chong'motko aganode uarangara manderangni badiaba somoeo janggi tangani bewal ba cholonrangko ra'gopc daksninge mesokanisan ong'aia. Ramram dakmesokanio mitam dakmesokgiparang jara-goka gita ba chonik-onnikani gita ong-pila. Uni gimin nigipa gimikko ka'dingatna mitam dakmesokanirangde ka dingani ong'janaba donga indiba uarang manderangko an'saoatna dakanisan ong'naba donga. Uni a'sel Ka'dingatna seani Drama ba Dakmesokani ka'dingatna mangmang mong-songe seaigipa ong'ja indiba Dakmesokani nokningo katchaani balwako gipaatna aro kusi ong'atao bon'atna gitaba ong'a. Jekae, Prof Kenneth Mominni segipa Dakmesokani "Nokdang" bon-kamao kusi ong'anio ba katchaanio bon'chotea.

KALIMANIKO DAKMESOKANI BA TRAGEDY.

Ia dolni Dakmesokaniara maiba duk ba kalimani gimin ba rasong giani gimin golpo segipa ong'a. Uni gimin Dukniko Dakmesokani gimin seaniara saoba dal'bea a selo ga'ake duko ga'akaniko daksninge mesokani ong'a. Aristotleni janapani gita indakgipa Dakmesoke kal'anirango mandeni saknaako ba duko ga'akaniko ba sianiko dakmesoka. Uni gimin indakgipa Dakmesokanio nigipa manderangni ka'sachakaniko aro kennani gisikko naatna man'ode uan chu'sokgipa dakmesokani ong'a.

Minggipin, indakgipa Dakmesokanirango maidakgipa manderang bakko ra paa uoba pangchaka. Mongsonggipa bakko ra'gipa namgijagipa mande ong'ode, ua dakmesokao duko ga'akoba nigipa manderang una ka'sachakjawa aro uni sioba duk ong rimpajawa. Batesa uni sianina kusi ong'batgen. Indiba namgipa mande dakmesokao siode nigiparang una ka'sachakgen aro duk man'chakgen aro Isolba una kakketko bichal ka'e tang-pilatna chol on'ja ine chanchigen.

Mingsagipara, duk ba kalimani ba siani gimin dakmesokaniko nie adita kusi ong'anikoba nigiparang man'a indiba uno dakmesokanirang dal'dalgipa manderangni ba rajarangni dakgikan janggi galani gimin ong'skana nanga. Uandake ong ode dukni gimin dakmesokani ong'oba manderangna kusiniko ra'bakua. Jekae, Karnesh R. Marakni segipa "Muga Dingsepa" o, Muga Dingsepa an'tangan an'tangni jakrikarango bebe ra'dugani a'sel uamangni jakchin so'otako man'aha.

AGANBEWALO BANAE SEGIPA GOLPO BA FICTION.

Dakmesokna seani jrimbegipa seani rokom ba bimang ong'a. Aganbewalchi banae segipa Golporangara ritchengbatgipa seani ong'skaa ine W.H. Hudson agana. Uan ritchengbatgipa seani ong'a ine agananide uandakgipa seanirangko bilsiprako English ku'sikchimangmangan king hajal bongarangko chapa ka'ata.

“Fiction” kattoo bang’a ortonang gnanng aro uko bang’a seani rokamrangna jakkalna man’a Novel ba Chongmotgipa janggi tangani obostarango pangchake segipa golporang baksaba bang’a changon uko apsan dake jakkala indiba Fiction aro Novelni dingtanggrikanirang gnanng. Fictionara Greek aro Romanrangni chasongonin dongbaachim indiba Novelde ua chasongrangode nakatku’jachim.

Minggipin, Fictionara bang’a rokomrangna aro bang’a miksonganirangna ku’akmachi segipa ong’a indiba Novelara apchonbatgipa miksongani gnanngipa seani ong’skaa. Bang’a ba maiba miksonganirangko aganna gita golpo mingsako banae seani, jekae, “Songregipani Songreani” ara Fiction ong’a, Novel ong’ja.

Aroba, Fictionara brinbawe dake seanirang ong’a. Uan sena changa sapaniko mesokna aro ku’akmachi seani bewalrangko parake mesokna seaniba ong’a Fiction kattara Latin ku’sik “Fingo” oni ong’baa jeni orto “Bimang dakna” ba “Rokomsa bewalona ra’bana”

Fiction ba banaedrae segipa golporang mandeni cholon bewalko nambatatna aro taningko bariatna dakchakani ong’ja ine skangni chasongrango pangnan kenchakani gnanngchim, maina indakgipa seanirangara tol’gipa aro ong’gijako banaedrae seaniraag ong’achim. Indakgipa golporangko segiparang an tangtangko togichenge gipinrangkoba togina miksonge seaha ine chanchiachim. Indiba ruutgija bilsirangni gisepo Fiction ba banaedrae segipa golporangba gamchatani gnanng ine kitap serakgipa manderang bebera’na a’bachengaha. Uamangni chanchichipani’gita Fictionko sena gita segipa an’tangni sko taningo golpo ko skang chanchichengna nangen, ukosa gipinna parakna nanga. Uni’gimin uan gisik ba skoo chanchichenggipa bimang ba golpo ong’a, bigbang seaigipa ong’ja. Gisiko bimang dakchenge seaniera banaedragipa ong’a maina ua bimang griaoniko bimang dakate seenga. Uni’gimin Fictionara Chatra gita ong’a maina uni’ning’o bang’a sko taning rokrokipile chanchianirangko dakna man’a.

SONGSARNI GOLPO BA NOVEL

“Novel” kattara Italian “Novella” kattaoni ong’baaha, aro uni orto “Kobor” ong’a. Uni’gimin Novel kattani orto gitade, mandeni janggi tangani chongmot’gipa obosta ong’aoniko ra’e jedake segipakon Novel minga, indiba uan ruutgijani bilsirango ong’gipa obosta ong’na nanga aro kakket ong’na nanga Jeba ong’bo, bang’a Novel kitapangan skangni chasongni gimia segiparangba donga. Uni’gimin Novelara aganbewalo adita bakroe banae segipa golpo jeon mandeni cholon bewalrang chongmotgipa janggi tangaoniko ra’e uamangko kajia jikate nanggrikata.

1700 bilsirangna skangde iandakgipa seani ba Novelara kandikgipa golposaanchim. 1700 bilsijolmangonisa kosako janapbagipa gita Novelko sena a’bachengaha. Da’ode indakgipa seani-

rangan pilak rokom seanirangna bate mongsongbatgipa seani ong'skaaha. Novel ba Songsarni golporangni dingtangmancha bewalrang ba rokomrang indake ong'a :—

(i) Novelko segipa golpomangmangko seaigija, manderangni cholon-bewalrangni, janggi tangani miksongani aro ong'enga obostarangni giminba gisik nange sejola.

(ii) Novel segipa maiba skidapani ba songsaro maiba neng'nika-nirangni giminba gisik nange, uarangni bidingo an'tangtangni ong'nikako sea.

(iii) Novel segipa, basakoba basakoba an'tangtangni gisikni skaniko parakna gita seanichi obostako ong'atdrae uarangko paraka.

(iv) Novelko segipa, golpomangmangko aganaigija mandeni aro agilsakni gimin apalbate nigope nie seaniko daka.

ROCHONA SEANI BA ESSAY

“Essay” kattako aro seani bimangko France a'songni Montaigne (1533-92) a'bachengataha aro bakbakan Englishchi Bacon seatpaaha. Ia kattani gita ortoara, maiba ideako ba maikoba ong'nika ong'nikgljaniko ba dake nie nikaniko aganku'akmachi agangrikate seani rokomsa ong'a. Kattani orto gita agangenchimode, Essayko sena maming niam dongja. Uko agangrikani bewalosanmangmang sena nangaia. Indiba uan namen manderangko gisik nangatani aro ku'sikko jakkalna changna dakchakani ong'a. Uni gimin pilak Essay seanirang poraigiparangna tongtong aro ripeng melie aganani gita ong'a. Essayni ramram miksongani rinokgipa aro chua gadango janggi tanggiparangni wal'timo golpo ka'e roani ong'oba, uan mandena skidapani giminba ong'jola. France a'songo Montaigne ia rokomo seaniko see manderangna nama skidapaniko on'na jakkalaha. Englando William Hazlitt, Charles Lamb aro gipinrang indakgipa seanichi an'tangtangni gisikni skaniko ba skatang chanchianirangko parakna jakkalskaaha.



CHAP - III.

POEDORANG.

Sea-jotanirangko aganbewalo rokom rokom bewalrango-mangmang seaija. Git ring'na ba sika moanirangko dakna gita rokom rokom bimangrango poedo seanirangchiba sea jotanirangko dakna man'a. Poedo seani bang'a bewalrang gnang. Uaragoniko ka'mao mitamrangko mesokatenga.

CHONGIPA GOLPONI POEDO BA BALLAD.

Ballad, Ballade, Ballet bimingrang Latin ba Italian ku'sik "Ballare" oni ong'baa. Uni orto "Chroka". Uni gimin indakgipa Poedorangara chrokna ring'aoni a'bachengbaaha. Doka-dam'anirang baksana mongsongbate Knal moani baksa kan'dik-gipa golpoko git ring'e agangipako Ballad Poedo ine minga. Ia poedoko knatimgiparang kattarangko aro gitko ring'aniko knana kusi ong'a aro chrok mesanaba am'pila. Uni gimin iako basakobade chrok-mcsani git ineba minga Serejing ringa aro Sonajingni Poedoko ia rokomni poedo ine mingna man'gen.

Bang'a katta bichongni ba subjectrangni, gimin Ballad poedoni bimango sena man'a. Ka'saaniara mai mai obostarangko ong'atna man'a, uko ia poedoni subject dake ra'na man'a. Bamani, Matgrikrangni kam, ramram manderangni dakbewal, aiao inmanpilgipa pelekki dakanirang, mandeni gisik sengani ba manderangni jatsa jatgipin baksa dakgrik-jegrika-nirangni gimin indakgipa poedoo subject ba katta bichong dake ra'e sena man'a.

Ballad poedo badita bakrona nanga maming niam dongja. Poedoni bakroa ba kan'dikani, poedoo janapgipa manderangni kamni kri ong'gen. Ua manderangni kamba ua poedo bon'on matchotna nangen.

Ballad poedoo stanzaprako ba tokprako riting bri bri dongja. Skanggipa aro gittamgipa poedoni ritingrang syllable chet donga aro gnigipa aro brigipa ritingrang syllable dok donga indiba badiaba badiaba Ballad poedorang indake apsan apsan syllablerang dongja.

DAL'A ONG'ANIKO AGANGIPA KATTA GITCHAM BA POEDO BA EPIC.

Ian jatni itihasni ba jatni aganritingbagipa golpooni saksa ba una bate manderangni daka kamrangni gimin bakrobegipa poedo rokomsa ong'a. Iandaka kamrangara dakgrik-dinggrikani-rang ong'rongbata jeon bang'a manderang aro mande-mite dakgiparang ua dakgrikanio jak on'paa. Iandakgipa peodorang bakrobegipa ong'eni gimin peodo segipa a'song chigarangni ba

gipin gipinrangni giminba sechapronga. Ian indakgipa rokomni poedo ong'ani gimin, Dikki-Bandini gimin katta aganon, namangni a'song-caigacanghi giminba bakrobeen aganchapanirang guang.

Epicni minggipin subject matter ba katta bichongara, mande jinmani ring'gimal ba ui'gimalrangoni ong'a aro tribal mande-rangni ba jatni gimin ong'rongbata. Iano poedo segipa an'tangni chanchianirangko ba chanchie ui'soanirangkomangmang seai-ja indiba jatsa gimikni chanchianirangko ba skanirangko sea.

Epic poedo gipin poedorangoni dingtanggrika. Ua dingtanggrikarangoni mitamrangko ka'mao janapatenga.

Skanggipa, Epic poedora namen rongjrigipa poedo ong'a.

Gnigipa, Epico kal'susaa ba bil tosusaanirangni gimin seani ong'a. Minggipin, ia poedorango kal'susaagipa manderangni rokom rokom chalakki dakanirangni giminba donga.

Ballad aro Epic poedorangni gisepo je gitaba dingtanggrikanirang dongbo, ua rokomgnian atchu ambirangni gimin songadamo skia mang'gijagipa manderangni aganbagipa ba ring'bagipa poedorang ong'a. Uarangni dingtanggrikaniara, chonggipa a'bimanduo donggipa abisa sakgnini atchia gita ong'a. Uamangoni saksa ua songon songdongaha aro songadamni mande ong'e sontolbee dongaha. Sakgipinara dal'gipa songjinmaona re'ange nama gana-chinaniko gane chine roaha. Ballad songadamo donggipa gita aro Epicara songjinmao donggipa gita chacha tosusana man'gen.

KALIMANI POEDO BA ELEGY.

Elegy kattara Greek ba Latin ku'sik "Elegia" oni ong'baaha. Greekrangni ia rokomo poedo sechengode mande sigipana miksonge sea ong jachim. Dakgrik-dinggrikani gimin ba Ka'saani giminrangsia ia bimango poedo serongachim. Jisu Kristoni siani bilsa ritchachidok ja'man jolrangosa ia seani bewalo English ku sikchi poedo sena a'bachengaha aro unonisa mande sigipana duk ong'e ia rokomo poedo sebaaha. Jekae, Thomas Grayni poedoko ja'rike D. S. Rongmuthu "Gittimini Goprammad sambao sinteani" ine ia poedo seani bewalo seskaaha Uandake bang'a poedo seiparangan ia bimango ripengtangg-rangko ba ka'satangrangko gisik ra'na gita poedorangko banac sebatokaha.

SIKA MOA BAKSA RING'ANI POEDO BA LYRIC.

Ramram jakkalanjo "Lyric" ni orto "Git" ong'a. Gitchem Greece a'songni chasongrango ian kual moan baksa ring'gipa git ong'a indiba da'ororoni chasongo iako Guitar aro gipin gipin sika moanirang baksaba doke dam'e ring'na man'a.

Indakgipa git ba poedoko saksanba ring'na man'a aro jinma-ba ring'na man'a. Iako git ring'e chroknaba man'a. Song-jinmarango donggiparangba skia man'ani kri ia gitrangko ring'an baksa nitoe chrokna man'a aro songadamrango donggiparangba ua gitrang baksa songadamni bewalo chrokna man'ia. Indiba da'ororoni chasongo banaegipa Lyric poedorango bang'an git ringna namja Uni gimin "Lyric" kattani ortoara "Kandikgipa Poedo" ni pal jakkalgipa biming ong'a jerangkon dingtang dingtang podrang-dake suala aro jerang-on poetni chanchianirangko ba ma'ringanirangko parakjoljole sea.

Lyric poedoni mongsonggipa gunara chanchianirangna bate be'enchi aro gisikchi ui'anirangko seani ong'a. Beben je ma'mal poedoba mandeni chanchianiko aro be'enchi aro gisikchi ui'niko man'gopna nanga indiba ia poedoo, be'en aro gisikchi ui'anian chanchiarangna skang re'baa. Uni gimin, Lyricara kandikgipa poedo ong'a jeon be'en aro gisikni ui'ani, gisikni ma'ringarangni ba mingsa chanchianikosan janapani gnang.

Lyric poedoni mongsonggipa subject ba katta bichongara "Ka'sagrikani" gimin ong bata. Me'asa me'chik ka sagrikani gimin ba pante me'tra baksa ka'sagrik-mikchagrikani giminba ia poedoni bimango seronga. Ia ka'sagrikaniara Isol aro mandeni gisepo ka'sagrikani giminba ong'na man'a ba mandeni ong'telaigipa bakrangna ka saaniba ong'na man'ia Indiba ia chasongrango lyric poedoni katta bichongrang dingtang dingtang ong'angengaha. Da proro poedo segipako je obostarangan duulachim ba je ong'enga obostarang uko sena didiatachim uarangko subject ba theme dake ra'eba seskaa, jekae "Michigrikani", "Duk Ong ani", "Siani" aro uandake.

RITING CHIBRICHI SEGIPA POEDO BA SONNET.

Ia ma'mal poedo ba Sonnetara riting chibrichi segipa poedo ong'a. Ia poedo dingtangmancha ma rapani gnang aro uko tokgni dake sualna man'a. Skanggipa toko riting chet aro gnigipa toko riting dok gnang. Ua tok gnion chanchiani rokomba dingtangani, gnang.

Sonnet ba riting chibrichi seani rokom poedoko Italy a'songo 1220 bilsa jolrango a'bachengataha Gitchambatsrang-gipa Sonnet poedoko man'rikkipara Sicily a'songni Giacono da Lentinoni segipa ong'achim. Ia ma'mal poedoko Dante aro Petrarch (1304-74) mingsing minggamataha jeni seani bewal-rangko Europe a'songrango poedo segiparang bang'a chasong-rangna ja'rike seangtokaha.

Ia riting chibrini poedoo mongsongbatgipa katta bichong-rangara "me'asako me'chikna kapaate" seanian ong'achim. Petrarchhi segipa "Laura de Noves" Sonnet poedoo, Petrarch Laura minggipa me'chikna maming ka'saani dongjachim aro

ua pangnaba un baksa agangrikamangba ,grichim. Aroba Laura namen mande ra'ako man'gipa, segipana kakket ong'gipa, dedrangna ka'sagipa aro songsulko nirok'gipa saksa me'chikma ong'achim. Uandaken ua segipana dedrang sak chisako ba'aha, Indioba Petrarch uko gisiktango nambatsranggipa me'chik ine chanchiate an'tangni poedo seao una an'tangni janggi tanga gimik ka'sae aro kakket ong'e dongaha. Uandake Danteba Gemma Donati minggipa me chikmana ka'sae uko kime donge degiparangko man'pilahaoba Beatrice Portinari minggipa me'chikko nambatsranggipa me'chik ine gisiktango chanchitingtinge an'tangni Sonnet poedo seao janapaha. Laurani segipa aro Danteni jikgipa ia Poedorangko porae niahama ba porae niahade uamang maiko chanchienggenchim uko darangba aganna man'ja indiba indake chel'ao me chikko dongate uko demittele poedo seani bewal ruuta chasongrangna Europe a'songrango namnikbatgipa poedo seani rokom ong'aha.

English ku'sikchi riting chibrini poedoko Sir Thomas Wyatt 1527 bilsio uni Italyo roe re'bap'لمان'o sechengaha. Uni ja'mano bang'a English poedo segiparang ia rokomo poedorangko seangskaaha.

SANABA BA MAINABA MIKSONGE SEGIPA POEDO BA ODE.

A bachengo ia rokom poedoko badiaba jat gimikni maniani gimin seaha. Iandakgipa poedoko Greek ku'sikchi 522-442 B. C. mango Pindar minggipa poedo serakgipa sechengaha aro Latin ku'sikchi Horace minggipa lekka serakgipa sechengaha. Pindarni segipa poedorangko chrok-mesagiparangna sika-moanirangchi sike moe on'rongachim. Iandakgipa poedorangko maiba mande jinmani ba jat gimikni manianina, jekae, Greece a'songni giticham chasongrango kal'susaoni chee re'bap'liparangna de mittelgipa kattarangchi poedorangko serongachim. Horaceba mande jinmani maniarangni gimin ia rokomo poedo seaha. Una agreba ua an'tangni gisik ra'a obostarangni giminba ia apsan poedo seani bewalo seaha.

English ku'sikchi ia rokom bewalo poedo seaniko Ben Johnson a'bachenge seaha. Uni ja'mano bang'a English poetrang ia apsan bewalo bang'a poedorangko seangaha. Uandaken English poetrangsa ia rokom poedo seaniko mingsing minggamataha.

JILANIRANGNI CHA'AMRAM BAKRANI POEDO BA PASTORAL

Jilanirangni Cha'amram Samsini Bakrani katta bichongko ra'e Poedo ba Aganku'akmaoba sena man'a. Iandakgipa Katta bichongko ra'e seanio, Songadam aro songjinmao janggi tanganiko tosusae seanian mongsongbatgipa ja'pang katta ong'a. Matchu aro Mes nirikgiparangni kusi ong'e janggi tangan gimimba iandakgipa seanirango serongbata. Jisu Kristoni atchina skang 280

bilsimango Theocritus Sicilyni songadamrangko gisik ra'ate, songjinmao donggipa mandeni songadamna ma'ringaniko mesok-na, an'tangni gisik ra'atjringgipa songni matchu nirikgiparangni gimin an'sengchakate seaniko dakaha. Ia seanionikosa gipin gipin indakgipa songadamni janggi tanganiko namnikgiparang Theocritusni seani bewalko ja'rike ia bewalo poedorangko seangskaaha.

Theocritus minggittam golporangko banae iandakgipa seaniko ba Pastoral form ba bimango seanirangko dakangaha, Uni seani ja' pang kattarang pangchakesa ja' mano segiparangba obostani kri on'tiprak dingtange seangskaaha. Theocritusni ming 3 seani ja' pang kattarang :- Skanggipa, Sakgni mes nirikgiparang gronggrike, kusi ong e rona ine git ring'susae an tangtangni kajiako namgrikatna gita tik ka grikaaha Gittamgipa mes nirikgipako bichal ka'timna donaha. Uamang saksani ja' mano saksa dake git ring'on an'tangtangni ka'sagrikani rango kusini aro duk-ni kattarangkoba aganjoljolangaha. Uamangni indake git ring'susae susaaniara paji mariona bon'choterongachim aro bang a changon bichal ka'gipa sani git ring'an knatobata basenan man-jachim Gnigipa, Saksa mes nirikgipa git ring ao an tangni mikchatang me'trani nama-silarangko aro an tangni raka janggi tangani gimin duk ong e janape ring achim. Sechengode git ring'gipani mikchatangni gimin janape git ring aniko sejoljolataiachim indiba ja'mano git ring gipani mikchatangni gimin janape git ring'na skang, nitoriri samsiarigipa bakrarangni gimin aro uni samtangtangchi nitobegipa a brirangni gimin sechengskaaha

Gittamgipa, Mande siana ba mande siako gopna ra'angani gimin seanian ja' rokom seanio baikamgipa katta bichong ong'baskaaha Iandakgipa, seanirango sianggipa mandeko de'mittele seani ong'batachim Je golpokoba banae sebo indiba ia bimango seani a bachengbanide jat gimikni maniao git ring'susagrikanisa ong'baachim.

Greece a'songo iandakgipa seani bewalko Rome songjinmao Virgil (70-19 B.C.) ra'gate sechengskaaha indiba uni sechengaonin nitoriri dake simdimdim dakgipa bakra aro nikgrangrani gimin seanide gimaangaha Ua Theocritusni seani bewal ba styleko ra'gatesa seskaiaha. Uandaken ja'mano seani katta bichongrangba dingtang ong'roroangaha Ja'manode, Poetni mal gamko on pilanma a'songni rajako mittele seani ba ripengtangni mikchatangko gimaatanina uko ka'dimnate seanirangsa ong'baskaaha. Uandaken ka'sne ka'sne ia bimango aro katta bichongchi seaniara songjinmao donggipa mandeni songadamo janggi tanganiko nambata ine chanchiate uana ma'ringe seani ong'baaha. Uni gimin songadamo songdonggipa manderangni skatang bewalrango rinok-gija janggi tanganirangni gimin seani pal songadamo janggi tangani somoe salrangara Sonani chasong inesa chanchichipate sebaskaaha.

Ia bimango aro ua katta bichongko ra'e English kusi'kchi John Milton, Hazlitt aro gipinrangsa seskae a'gilsak gimiknan gipatskaaha.

RITING BONGACHI KA'DINGATNAMANGMANG SEGIPA POEDO BA LIMERICK

Ian riting bongachi manderangko ka'dingatnamang mang seai-
gipa poedo rokomsa ong'a. Iandagipa poedorangko maming
chanchisoani gri seaia. Iako sena gita niamrangba dongja, ma-
ming ning'tua miksonganiba dongja ba uarango maming style ba
bimangba gri. Iano maming golpoba dongja indiba manderangko
ka'dingate ronasanmangmang seani gita ong'aia. Iani skanggipa
aro gnigipa ritingrango ma'rapani ong'na nangaia aro gittamgipa
aro brigipa ritingrangba ma'rapnasan nangaia. Bongagipa riting
sagipa aro gnigipa ritingrangrang baksa ma'rapskana nangaia
indiba ian attamrango wal'tim chake romitingrango minge minge
ka'dinge rona nambegipa podrang ong'a.

